

Zamjenici ministara

Dokumenti KM

[CM\(2012\)40-final](#) 29.03.2012.

Smjernice [\[1\]](#) Komiteta ministara za izbor kandidata za poziciju sudije u Evropskom sudu za ljudska prava

Smjernice Komiteta ministara za izbor kandidata za poziciju sudije u Evropskom sudu za ljudska prava

(Usvojeno od strane Komiteta ministara dana 28.03.2012. godine

na 1138. sjednici Zamjenika ministara)

Komitet ministara,

Naglašavajući temeljnu ulogu Visokih ugovornih strana u predlaganju najkvalitetnijih kandidata za izbor sudija Evropskog suda za ljudska prava (u daljem tekstu „Sud“) kako bi se očuvala nepristrasnost i kvalitet Suda, što jača njegov autoritet i vjerodostojnost;

Podsjećajući na članove 21. i 22. Evropske konvencije o ljudskim pravima (u daljem tekstu „Konvencija“, ETS br. 5), koji propisuju kriterije za tu dužnost, odnosno povjeravaju Parlamentarnoj skupštini zadatak izbora sudija s liste od tri kandidata koje nominira svaka Visoka ugovorna strana;

Podsjećajući na Deklaraciju usvojenu na Konferenciji na visokom nivou o budućnosti Evropskog suda za ljudska prava (Interlaken, Švicarska, 18. i 19.02.2010) koja je istaknula važnost održavanja neovisnosti sudija i očuvanja nepristrasnosti i kvaliteta Suda;

Podsjećajući, također, na Deklaraciju usvojenu na Konferenciji na visokom nivou o budućnosti Evropskog suda za ljudska prava (Izmir, Turska, 26. i 27.04.2011) u kojoj je istaknuta potreba da se dobri potencijalni kandidati potaknu na podnošenje prijave za poziciju sudije Suda, te da se osigura održivo angažiranje kompetentnih sudija s odgovarajućim iskustvom, kao i nepristrasnost i kvalitet Suda;

Podsjećajući na Rezoluciju Komiteta ministara [CM/Res\(2010\)26](#) o uspostavi Savjetodavnog vijeća eksperata o kandidatima za izbor sudija Evropskog suda za ljudska prava (u daljem tekstu „Savjetodavno vijeće“) koja je ponovno istaknula odgovornost Visokih ugovornih strana, potpisnica Konvencije da osiguraju pravičan i transparentan postupak selekcije;

Podsjećajući na Preporuku 1649 (2004) Parlamentarne skupštine o kandidatima za Evropski sud za ljudska prava i odgovor Komiteta ministrara na nju;

Uzimajući u obzir različite rezolucije Parlamentarne skupštine o tom pitanju, uključujući i Rezoluciju 1646 (2009) o nominiranju kandidata i izboru sudija u Evropski sud za ljudska prava,

Donosi sljedeće smjernice i poziva Visoke ugovorne strane da ih primijene i osiguraju njihovu široku distribuciju, zajedno s obrazloženjem, a naročito njihovo dostavljanje svim organima vlasti koji su uključeni u izbor kandidata za poziciju sudije Suda, te po potrebi, prijevod na službeni jezik/jezike zemlje.

I. Obim smjernica

Ove smjernice se odnose na domaće postupke selekcije kandidata za poziciju sudije Suda prije dostavljanja liste kandidata Visoke ugovorne strane Savjetodavnom vijeću, a potom Parlamentarnoj skupštini Vijeća Evrope.

II. Kriteriji za sastavljanje lista kandidata

1. Kandidati moraju biti visoko moralni po svom karakteru.
2. Kandidati moraju posjedovati kvalifikacije potrebne za imenovanje na visoku pravosudnu funkciju ili biti priznati pravni stručnjaci.
3. Kandidati moraju, kao apsolutni minimum, vladati jednim službenim jezikom Vijeća Evrope (engleskim ili francuskim), te posjedovati barem pasivno znanje drugog, kako bi bili u stanju u potpunosti učestvovati u radu Suda.
4. Kandidati moraju poznavati domaći pravni sistem/sisteme, kao i javno međunarodno pravo. Također je poželjno posjedovanje praktičnog pravnog iskustva.
5. Ako budu izabrani, kandidati bi u pravilu trebali biti u mogućnosti da obnašaju tu dužnost u trajanju barem polovine devetogodišnjeg mandata prije nego što napune 70 godina.
6. Kandidati se trebaju obavezati, ukoliko budu izabrani, da se za vrijeme trajanja mandata neće baviti bilo kakvom aktivnošću koja nije kompatibilna s njihovom neovisnošću i nepristrasnošću, ili sa zahtjevima obavljanja dužnosti puno radno vrijeme.
7. Ukoliko kandidat bude izabran, to ne smije, u mjeri u kojoj se to može predvidjeti, rezultirati čestom, odnosno dugotrajnom potrebom da se imenuje ad hoc sudija.
8. Liste kandidata u pravilu trebaju sadržavati barem po jednog kandidata svakog spola, osim ukoliko je spol kandidata na listi manjinski zastupljen na Sudu (manje od 40% sudija) ili ukoliko postoje izuzetne okolnosti za odstupanje od ovog pravila.

III. Procedura objavljivanja poziva za podnošenje prijave

1. Procedura objavljivanja poziva za podnošenje prijave treba biti stabilna i unaprijed utvrđena kodificiranjem ili ustaljenom administrativnom praksom. Ovo može biti stalna procedura ili procedura otvorena u slučaju svakog procesa selekcije. Pojedini procedure moraju biti javno dostupne.
2. Poziv za podnošenje prijave treba biti dostupan širokoj javnosti, na način da se može opravdano očekivati da će za njega saznati svi ili većina potencijalno odgovarajućih kandidata.

3. Država bi, po potrebi, trebala razmotriti poduzimanje odgovarajućih dodatnih mjera kako bi osigurala predstavljanje dovoljnog broja dobrih podnositelja prijave te omogućila tijelu koje vrši selekciju da predloži zadovoljavajuću listu kandidata.

4. Ukoliko domaća procedura dozvoljava ili zahtijeva da treća strana predloži podnositelje prijave, potrebno je uspostaviti zaštitne mehanizme kako bi se osiguralo pravično i nepristrasno razmatranje svih podnositelja prijave, te kako se oni koji ispunjavaju uvjete ne bi destimulirali ili onemogućili da se prijave.

5. Za podnošenje prijava potrebno je ostaviti razuman vremenski rok.

IV. Procedura sastavljanja preporučene liste kandidata

1. Tijelo odgovorno za predlaganje kandidata treba biti uravnoteženog sastava. Njegovi članovi kolektivno trebaju imati dovoljno stručnog znanja, te ulijevati poštovanje i povjerenje. Oni trebaju biti različite pripadnosti, sličnog profesionalnog ugleda, te osobe koje ne podliježu neprimjerenim utjecajima, iako im je dozvoljeno da zatraže relevantne informacije iz vanjskih izvora.

2. Potrebno je obaviti razgovor sa svim ozbiljnim prijavljenim kandidatima, osim ukoliko to praktično nije moguće zbog njihovog broja, u kojem slučaju tijelo za predlaganje kandidata treba sastaviti skraćenu listu najboljih kandidata na osnovu primljenih prijava. Razgovori se, u pravilu, trebaju odvijati prema standardiziranoj formi.

3. Potrebno je izvršiti i ocjenu jezičkih sposobnosti prijavljenih kandidata, po mogućnosti tokom razgovora.

4. Svim članovima tijela za predlaganje kandidata treba omogućiti ravnopravno učešće u donošenju odluke, s tim da procedure ovog tijela moraju osigurati da je ono uvijek u stanju donijeti odluku.

V. Finalizacija liste kandidata

1. Svako odstupanje donositelja konačne odluke od preporuke tijela koje vrši izbor treba biti opravdano pozivanjem na kriterije za sastavljanje liste kandidata.

2. Prijavljenim kandidatima treba biti omogućeno da dobiju informacije u vezi sa razmatranjem njihove prijave kada je to u skladu s općim načelima povjerljivosti informacija u kontekstu domaćeg pravnog sistema.

3. Na domaćem nivou treba sastaviti konačnu listu kandidata koja će se prezentirati Parlamentarnoj skupštini.

VI. Konsultacije sa Savjetodavnim vijećem stručnjaka o kandidatima za izbor sudije Evropskog suda za ljudska prava^[2]

1. Visoke ugovorne stranes trebaju podnijeti svoju listu kandidata Parlamentarnoj skupštini nakon pribavljenog mišljenja Savjetodavnog vijeća o sposobnosti kandidata da ispune zahtjeve iz Konvencije.

2. Prilikom dostavljanja imena i životopisa kandidata, Visoke ugovorne strane trebaju Savjetodavnom vijeću podnijeti informaciju o domaćoj proceduri selekcije.

[1] Izmjene i dopune na 1213. sjednici (26.11.2014, odluka [CM/Del/Dec\(2014\)1213/1.5](#)).

[2] Izmjene i dopune na 1213. sjednici (26.11.2014, odluka [CM/Del/Dec\(2014\)1213/1.5](#)).

Povezani dokumenti

[Sjednice](#)

[1138. sjednica Zamjenika Ministara \(CM Room\) - Sjednice 2012](#) / 28.03.2012 / *engleski*